

**PROTOCOLO XERAL DE ACTUACIÓN ENTRE A XUNTA DE GALICIA E A  
FEDERACIÓN GALEGA DE MUNICIPIOS E PROVINCIAS PARA FOMENTAR A  
IMPLANTACIÓN E FIXACIÓN DE EMPRESAS EN GALICIA MEDIANTE A  
CREACIÓN DA INICIATIVA “CONCELLOS DOING BUSINESS GALICIA”**


Santiago de Compostela, a 10 de outubro de 2017

Dunha parte, Don Alberto Núñez Feijóo, Presidente da Xunta de Galicia que actúa para este acto en representación desta en virtude do disposto nos artigos 10 e 24 da Lei 1/1983, do 22 de febreiro, das normas reguladoras da Xunta e da súa Presidencia.


Pola outra parte, Don Alfredo Laudelino García Rodríguez, Presidente da Federación Galega de Municipios e Provincias (Fegamp) que actúa para este acto en representación desta en virtude do disposto nos artigos 44 e 46.1.B dos seus Estatutos.

As partes comparecentes recoñécense entre si capacidade xurídica suficiente e poder abondo para obrigarse neste protocolo e, para tal efecto

**EXPOÑEN**



**Primeiro.-** Que a Xunta de Galicia, para o exercicio das súas competencias e funcións establecidas pola Lei 1/1983, do 22 de febreiro, de normas reguladoras da Xunta e da súa Presidencia, pode establecer protocolos xerais de actuación con institucións públicas ou privadas interesadas no ámbito das súas funcións, así como colaborar con outras administracións.





**Segundo.-** Que a Fegamp é a única entidade asociativa das entidades locais de ámbito autonómico e, de conformidade co establecido na disposición transitoria terceira da Lei 5/1997, do 22 de xullo, da Administración Local de Galicia, está recoñecida polas entidades locais galegas como a entidade asociativa mais representativa e maioritaria e terá as facultades derivadas da súa representatividade, constituíndo un excelente marco para realizar a difusión, coordinación e execución de determinadas programacións nos concellos e provincias ás que representa.

**Terceiro.-** Que concorren na sinatura deste protocolo razóns de interese público xa que a Xunta de Galicia considera necesario impulsar medidas que favorezan e fomenten a implantación e fixación de empresas no territorio galego. Con ese obxectivo, resulta determinante o establecemento de determinados incentivos para consolidar a decisión das empresas de implantación ou non no territorio da Comunidade Autónoma de Galicia. A tal fin poñerase en funcionamento a iniciativa "Concellos Doing Business Galicia".

**Cuarto.-** Para alcanzar o obxectivo mencionado faise necesario contar coa colaboración da Fegamp, pola súa representatividade, xa que abarca a todos os municipios e provincias de Galicia e tamén porque constitúe a maior vía de difusión, coordinación e execución dentro dos concellos.

Ao abeiro do exposto e coa finalidade de levar a cabo as actuacións de conformidade co obxectivo previsto, as partes asinantes acordan formalizar o protocolo marco de colaboración con suxeición as seguintes,



## **CLÁUSULAS**

### **Primeira.- Obxecto**

O obxecto deste protocolo de actuación é establecer un marco de colaboración entre a Xunta de Galicia e as diferentes administracións locais de Galicia, de xeito que poidan implicarse de maneira directa no fomento da implantación e fixación de empresas no

territorio da Comunidade Autónoma de Galicia, mediante a posta en marcha da iniciativa "Concellos Doing Business Galicia".

### **Segunda.- Compromisos don concellos**

Para que os concellos de Galicia poidan participar na iniciativa "Doing Business Galicia" deberán adoptar as seguintes medidas:

1.- Imposto sobre bes inmobles: aprobar mediante acordo plenario unha modificación da ordenanza fiscal reguladora deste imposto que estableza unha bonificación potestativa de ata o 95% da cota íntegra do imposto a favor de inmobles urbanos nos que se desenvolvan actividades económicas que sexan declaradas de especial interese ou utilidade municipal por concorrer circunstancias de fomento do emprego, regulada no artigo 74.2 quáter do Real Decreto Legislativo 2/2004, de 5 de marzo, polo que se aproba o Texto Refundido da Lei Reguladora das Facendas Locais. Esta medida será de aplicación unicamente a aqueles supostos de implantación dunha nova actividade económica ou empresarial, así como a aqueles outros que consistan nunha ampliación das instalacións sempre e cando implique creación de emprego.

2.- Imposto sobre actividades económicas: aprobar mediante acordo plenario unha modificación da ordenanza fiscal reguladora deste imposto no que se estableza unha bonificación de ata o 95 por cento da cota correspondente para os suxeitos pasivos que tributen por cota municipal e que desenvolvan actividades económicas que sexan declaradas de especial interese ou utilidade municipal por concorrer circunstancias de fomento do emprego que xustifiquen tal declaración, regulada no artigo 88.2 letra e) do Real Decreto Legislativo 2/2004, de 5 de marzo, polo que se aproba o Texto Refundido da Lei Reguladora das Facendas Locais. Esta medida será de aplicación unicamente a aqueles supostos de implantación dunha nova actividade económica ou empresarial, así como a aqueles outros que consistan nunha ampliación das instalacións sempre e cando implique creación de emprego.



3.- Imposto sobre construcións, instalacións e obras: aprobar mediante acordo plenario unha modificación da ordenanza fiscal reguladora deste imposto no que se estableza unha bonificación potestativa de ata o 95% para as construcións, instalacións ou obras que sexan declaradas de especial interese ou utilidade municipal por concorrer circunstancias de fomento do emprego, regulada no artigo 103.2 a) do Real Decreto Legislativo 2/2004, de 5 de marzo, polo que se aproba o Texto Refundido da Lei Reguladora das Facendas Locais. Esta medida será de aplicación unicamente a aqueles supostos de implantación dunha nova actividade económica ou empresarial, así como a aqueles outros que consistan nunha ampliación das instalacións sempre e cando implique creación de emprego.

4.- Taxa pola prestación de servizos urbanísticos ou equivalente: aprobar mediante acordo plenario o establecemento á non suxeición a esta taxa dos autónomos e empresas que soliciten licenza de obra ou verificación “a posteriori” de comunicación previa para levar a cabo a súa implantación no termo municipal, así como para a ampliación dun establecemento empresarial xa existente sempre que conleve a creación de novos postos de traballo, cando o seu código CNAE corresponda a algunha actividade económica das incluídas no eido da industria 4.0 ou da Ris3.

5.- Taxa pola apertura de establecementos: aprobar mediante acordo plenario o establecemento á non suxeición a esta taxa dos autónomos e empresas que soliciten licenza de apertura ou verificación “a posteriori” de comunicación previa para levar a cabo a súa implantación no termo municipal, así como para a ampliación dun establecemento empresarial xa existente sempre que conleve a creación de novos postos de traballo, cando o seu código CNAE corresponda a algunha actividade económica das incluídas no eido da industria 4.0 ou da Ris3.

6.- Compromiso de resolver as solicitudes de licenza de obra maior nas que o petionario sexa unha empresa ou un autónomo para a construción dunha edificación destinada á primeira implantación dunha actividade, nun prazo máximo de 30 días naturais dende que o concello dispón da documentación completa e de todos os informes sectoriais preceptivos.

7.- En materia de solo empresarial, aqueles concellos que sexan titulares deste tipo de solo, adoptan o compromiso de fixar prezos competitivos das parcelas establecendo bonificacións sobre os mesmos que variarán segundo a zona do territorio onde estean ubicados.

Así mesmo, comprométense a incorporar e ofrecer ás empresas a posibilidade de acudir á figura xurídica do dereito de superficie nos termos regulados no artigo 53.1 do Real Decreto Lexislativo 7/2015, de 30 de outubro, polo que se aproba o Texto Refundido da Lei do Solo e Rehabilitación Urbana.

8.- En relación coa bonificación potestativa de ata o 95% no IBI, IAE ou ICIO para supostos declarados de especial interese ou utilidade municipal por concorrer circunstancias de fomento do emprego, estableceranse os seguintes tramos:

- Ata 95 por 100 pola creación de máis de 20 postos de traballo
- Cando menos o 75 por 100 pola creación de entre 11 e 20 postos de traballo
- Cando menos o 50 por 100 pola creación de ata 10 postos de traballo

9.- As medidas de carácter fiscal comprometidas deberán manterse cando menos tres exercicios orzamentarios.

### **Terceira.- Compromisos da Xunta de Galicia**

Os concellos que se acollan á iniciativa "Doing Business Galicia" veranse beneficiados das diferentes medidas que vai promover a Xunta de Galicia coa finalidade de alcanzar o obxectivo de favorecer e fomentar a implantación de empresas no territorio da Comunidade Autónoma de Galicia. En concreto:


1.- A Xunta de Galicia establecerá unha discriminación positiva a favor de aqueles concellos solicitantes de subvencións destinadas a investimentos e gastos nos eidos industrial, do emprego e do emprendemento, cando as mesmas sexan convocadas en réxime de concorrència competitiva por calquera consellería ou entidade pertencente ao sector público autonómico de Galicia, mediante a regulación nas bases da convocatoria dun criterio específico neste sentido no que o baremo de puntuación supoña, cando menos, o 20 por 100, do total.

2.- Os concellos adheridos a este protocolo poderán integrar o solo industrial da súa titularidade no Observatorio de Solo Empresarial creado pola Xunta de Galicia co fin de centralizar a información relativa á oferta de inmobles empresariais (naves, parcelas, oficinas, viveiros de empresas...), e ofrecer ás empresas e emprendedores unha localización en Galicia para o desenvolvemento da súa actividade.

3.- Creación dunha marca territorial, asociada á Oficina Doing Business, como plataforma de colaboración para reducir as cargas administrativas ás empresas e que funcione a modo de xanela única. Os adheridos ao protocolo adquirirán, a condición de "Concello Doing Bussines Galicia", o que suporá un reforzo do posicionamento global do concello con respecto aos non integrados nesta marca territorial, e identificará os activos tanxibles e intanxibles que posúe Galicia en xeral, e os seus diferentes municipios en particular, e que lles garanten diferenciarse doutros territorios.

#### **Cuarta.- Compromisos e obrigas asumidos pola Fegamp**

A Fegamp comprométese a poñer a disposición dos concellos de Galicia a súa infraestrutura, medios materiais e humanos, organización e capacidade de xestión para acadar o obxectivo do presente protocolo.



Na difusión pública que se realice do proxecto obxecto deste protocolo, consignarase expresamente a referencia á Xunta de Galicia e á Fegamp como entidades que impulsan conxuntamente as actuacións que desenvolve este protocolo.


#### **Quinta.- Réxime xurídico**

O presente protocolo límitase a establecer as pautas de actuación sobre unha cuestión de interese común para as partes asinantes, tratándose dun acordo programático ou declarativo e sen eficacia obligacional, cuxo cumprimento non é susceptible de ser esixido xuridicamente.

E en proba de conformidade, asínase o presente acordo por duplicado exemplar na data e lugar indicados no encabezamento,

O presidente da Xunta de Galicia

Alberto Núñez Feijoo



O presidente da Fegamp

Alfredo L. García Rodríguez

